


九十五



南甸宣撫司

去省城以程計化二十三

東界怒江司

南

界隴川司

西界下崖司

北界騰衝州

舊名南宋元至元二十六年置南甸路軍民總管

府領三甸

皇明洪武十五年改為南甸府永樂

十二年改為州正統八年陞南甸宣撫司 正宣

撫刁姓副宣撫劉姓○志云丙弄山在司東十里

山有石和尚相傳昔大理一僧來南甸坐化于此

久乃變石後經兵燹止存石頭猶奉祀焉○蠻于

山在司東十五里勢甚險阻土酋居之○溫泉山

在司東二十五里山嶺層疊綿亘二十餘里駁然

林水之下溫泉湧出○沙木籠山在司南百里其

上設關立木為柵周一里餘靖遠伯破思賊寨即

此山也○南牙山即巡撫程宗與夷婦曩罕弄會

議之處在司西八十里高峻若建牙延袤百餘里

官道必經之樹木陰森石棧重疊夷人恃此為險

其泉注處與小梁河合名南牙江○小梁河在司

東北三十里有二源皆出騰衝一為赤土山一為

緬菁山至此合為一西南流至于崖為安樂河而

合于大盈江○孟乃河在司東南百七十里即騰

越龍川江之源○大盈江源自騰越流至司境過

鎮西入于緬甸○滇畧云南甸于崖隴川所謂一

宜也在騰越南半個山下其山巔界限華夷北寒

南暑迥然各天南甸俗與木邦同婚姻用穀茶二

筒雞子數籠客至以之供奉手拈而食亦產叫雞

紅藤篾雞晝夜應時鳴篾夷婦之腰膝

千崖宣撫司去省城以程計者二十三東西俱界南甸司

南界隴川司

其地舊名于賴賧一日渠瀾賧焚夷居之元中統

初內附至元中置鎮西路軍民總管府領一甸

皇明洪武初改府已立于崖長官司正統間陞宣

撫司正官撫刀姓副官撫劉姓土經歷廖姓○雲
晃山在司南十五里上有瀑布注爲河亦曰雲晃
流合安樂河○雲籠山在司東二十五里山之水
發源騰越經南甸迤邐至司東北爲止西河又流
十五里與安樂河合安樂河卽雲籠河也又環司
治北折而西百五十里爲棋榔江至北蘇蠻界注
金沙江入緬按北蘇卽漢北蘇縣後漢以之屬永
昌郡者○白蓮山在司北六十里中有一峰林巒
聳拔土官居其下有池產白蓮夷中貴之○司西
百餘里有刺朋山產竹鬮肥大如兔境土甚熱四
時有蠶能織五色土錦克貢○滇附錄日出騰衝
鎮夷關爲南甸又西爲干崖其地雖冬月衣葛汗
猶如雨又西爲布嶺稍涼如騰衝焉又西爲雷弄
又西爲揭陽又西爲孟乃又西爲火崗其炎毒又
倍于二甸矣

隴川宣撫司

去省城以程計二十六

東界芒市司

南

界木邦司

西界干崖司

北界南甸司

舊爲麓川地在芒施路東其地曰大布茫曰賸頭
附賽曰賸中彈吉曰賸尾福祿塘皆百夷所居元
中統初內附至元十三年置麓川路隸金齒宣撫

司 皇明洪武十七年歸附置麓川平緬宣慰司
正統三年土酋思任發叛大軍平之遂革其宣慰

十一年復置立司于隴把之地故名其宣撫多姓
○按平緬路北近柔遠柔遠即潞江安撫司也其

地曰驃賧曰羅必四庄曰小沙摩弄曰驃賧頭百
夷居之中統初內附至元十三年立為路隸金齒

宣撫司 本朝沿革無攷或併入麓川○司境有
羅木摩梨馬鞍三山靖遠伯追思任發至馬鞍山

即此山石鏢中流溫泉成河熱如沸湯其風俗與
南甸相同蹲鴟有大者長一尺二三寸○滇畧云

隴川麓川也有諸葛孔明寄箭山過此盡平地一
望數千里絕無山谿亦無果樹○大白夷在隴川

西男子剪髮紋身婦人跣足染齒以色布裹其首
飲食簡而頗精居喜近水便浴婦人惟緊護兩乳

謂乳非父母所生乃天地所賜不宜人見也男逸
女勞紡績擔負不輟其人強壯者寡柔弱者多

皇明正統初年思任發既擁麓川之眾攻孟養宣
慰遂屠騰衝據潞江自稱曰法法夷王號也方政

既喪師六年二月上遣大司馬驥定西伯貴益發
川廣粵西黔中及京營軍十二萬擊之五月至雲

南都指揮馬讓郎中侯璉督軍與戰大破之斬數百級獲象馬貨物無筭十一月因風縱火焚柵斬五萬餘級賊奔沙木籠南甸地界也據險爲七寨又大破之十二月追至馬鞍山賊列象爲陣營壘相望尚有十餘萬衆復縱火焚破之死于水火鋒鏑者八萬餘遂蕩平其穴振旅日上親宴于奉天門頒賜誥券加封靖遠伯旣而雲南鎮守又報思任發爲緬所獲上曰不免勞卿再一行耳驥于是復至金齒遣人招芒市干崖南甸潞江茶山等二十餘寨酋長悉來送款又遣人下緬促送思任發緬人佯諾不來乃調川湖雲貴兵俱至騰衝分爲五營驥與蔣貴及少監蕭保分爲三營總兵沐昂侍郎侯璉率東路兵徑擣麓川以陳儀領前鋒三千開南甸之南牙山斷賊走路緬人以兵迎戰蔣貴舟師匝江而下焚其舟數百艘大戰一晝夜殺三千餘人而緬人仍載賊首遁去獲其妻子象馬寶玉甚衆捷聞勅班師上慰勞如前未幾鎮守又報任發之子機發卜發據孟養跳梁十二年春復命靖遠伯征麓川調夷漢兵十三萬進至金齒抵金沙江構浮梁亘千數百尺渡兵運餉賊

于兩岸立柵拒戰麾兵悉渡一鼓破之賊又于鬼
哭山立三大柵驥與總兵張軌親冒矢石戰一日
而寨柵悉拔獲機發等一云死于亂兵而南服自
此底定矣○天順日錄有云麓川之後三舉兵寇
首竟亦通誅其費需餉濫陞秩者皆不足計但將
士死兵革者十數萬民愈不堪命先臣彭韶曰唐
天寶固多事雲南今正統雲南亦多事驥功之首
亦罪之魁也○滇畧云萬曆三十五年隴川宣撫
多安民叛歸緬緱鎮撫林承恩越二年始伏誅隴
川平有隴川曲十六首直指鄧漢作也如凱歌之
類其末章云歌桃舞柘樂時清繡戶瓊窓映日明
合讌初聞破陣曲新詞題作隴川平

孟密安撫司 去省城未詳

舊為木邦部落界有寶井木邦之利使其陶猛司
歪者領之陶猛猶言頭目也司歪者木邦宣慰罕
標以女曩罕弄妻之罕弄據有寶井每藐視其父
家標死立孫罕窆為宣慰曩罕弄陰叛之然未敢
公侵其地成化中鎮守內臣需索寶石聽其開採
遂畧木邦地以自廣內臣又疏其罪請征之有通
客謂曩罕弄若以重寶賂時相不惟罷兵且可殺

官比于木邦從之于時廷遣都御史程宗往撫曩罕弄初意出迓及得所遣行賂使信息遂倨傲不出且曰我見都堂須坐講亦許之又曰須都堂就見我乃會于南牙山實南甸宣撫地也曩罕弄謂宗曰我猛密之于木邦譬大象之孕小象也今小象長成軀倍大象矣寧能復納大象腹中乎宗無以應遂以所畧木邦地畀之爲奏設安撫司以司歪子孫世襲後遂盡奪木邦地罕罕出奔四鄰諸番不平之往往弄兵藉口其後副使林俊稍稍令割故地還木邦然竟讐言終未已○滇附錄云寶井者環孟密諸夷若木邦碧松孟貢孟養所必爭也昔靖遠伯王驥征麓川與盟曰石若爛方渡金沙岸諸夷守之不敢失弘治中有守臣銳意立奇功乃誘孟良過金沙江令攻孟密騷動者數年邊人至今憾之○滇畧云寶石未平以西皆有之生山坳溪澗涇水之所謂之寶井色類不一亦懸絕蔚藍色而重數兩者卽逾千金然亦不多得也其雜碎者爲寶砂○孟密在騰越南千餘里其地產寶井金礦估客雲集山高田少米穀騰貴花果瓜蔬與中國同但多地羊鬼爲行人崇南距緬僅十

程常苦侵暴土酋思姓後以避緬徙蠻莫

蠻莫安撫司

猛密分地也在騰越西蠻哈山下山如象鼻行者
累足風俗與猛密同萬曆十三年置亦思姓

孟養軍民宣慰使司

去省城以程計有七

東界金

沙江 西界大古喇司

南界緬甸司

北界干崖司

地名香柏城俗呼迤西元至元二十六年置雲遠

路軍民總管府 皇明洪武十五年去軍民總管

府字十七年改孟養軍民宣慰使司○民性生野

小有鬻隙卽構兵相殺其土地下濕夜寒民多瀕

江爲竹樓居日凡數浴有鬼窟山險甚據爲硬寨

官民皆髡首黥足有不髡者則酋長殺之不黥足

者衆唾之爲婦人女則縮髮腦後白布裹之布衫

桶裙白行纏而跣足有遮些蠻縮髮爲髻男女皆
貫耳佩環性喜華彩衣僅盤旋蔽體飲食精潔戰
鬪長于弓矢倚恃象銃稍與緬同孟養一帶多其
種類○正統中麓川之師基于孟養而孟養之地
竟歸思氏今則未詳□初孟養宣慰刀賓王昏懦
不能填輯諸夷思仁其部下貴姓酋也一云是麓
川宣慰卽思任發結好麓川平緬宣慰遂擁衆以
叛日侵孟養削其地刀賓王奔永昌死無子思仁
勢益張遂肆其蹂躪朝命黔國公晟及左都督方
政等征之政一軍皆沒黔國公發憤薨廷議與置
不問 上遣兵部尚書王驥定西伯蔣貴大征之
○通考云思仁敗奔緬驥乃以所畧孟養地畀緬
以購思仁緬人殺之縛其子思機發送京師以子
銀起莽居守孟養頃之麓川夷擁思仁少子思祿
逐莽復據其地思祿雖無職守其豪僭夷中無異
王者于是孟養宣慰司在廢除之數矣弘治初詔
以金牌信符給徼外土酋兵部忘之仍以舊號頒
給思祿竊爲真授以誇誑諸夷畧取旁小邑自廣
又乘木邦之亂攻猛密取蠻莫十七寨已復遣人
赴京奏願入蠻莫十寨贖罪得比米魯乞以一子

爲土官復宣慰如故朝議未許思祿遂據孟養而自立萬曆十三年始立孟養長官司

孟璉長官司

舊名哈龍正統間平麓川始來歸附在車里木邦之閩所部內有莫乃場礦世專其利以致殷富人多剽悍好劫掠

者樂甸長官司

去省城一千一百七十里

東界新化州

西界鎮沅府

南界鈕兀長官司

北界

景東府

唐南詔蒙氏屬馬龍他郎二甸地曰猛摩夷名者

島後爲阿剌諸郡所據段氏莫能服元時內附以

屬他郎甸管民官隸元江路

皇明洪武末分置

今司其長官刀姓○司治在者島山下以音近爲

者樂也○蒙樂山在司東二百里一名無量山巍

然高峻窮日之力方陟其巔有毒泉人畜飲之卽

死蒙氏封爲南嶽詳見景東□蒙樂山寺有古殿

世傳阿育王娶天女之處其棟柱自空中飛來者

○景東河流經本甸下入馬龍江源自景東府界

來故名○甸產阿魏相傳大樹凝脂下洒着物卽

化市之鬻者皆其化也故諺曰阿魏無真此物極

臭而能止臭殺蟲消痞辟瘟治瘧諸鬼物畏之一
名合昔泥夷人以淹羊肉甚美○俗以氊布茶鹽
貿易五日一集或十日一集且則婦人日中則男
子更代為市

鈕兀禦夷長官司 去省城以程計十六 東界元江府

南界車里司 西界威遠州 北界臨安

之思陀甸

蠻名也兀自古不通中國 本朝宣德七年始歸

附置今司○志云民皆倭泥類蒲蠻男子縮髻于

頂白布纏頭婦人白皙盤頭露頂以花布為套頭

見人不拜

芒市禦夷長官司 去省城以程計二十三 東界鎮康州

西南俱界隴川司 北界永昌之潞江司

其地舊曰怒謀曰大柘賧小柘賧即唐史所謂茫

施蠻也在永昌西南四百里元中統初內附至元

十三年立茫施路軍民總管府領二甸隸金齒宜

撫司 本朝洪武十五年置茫施府正統九年改

置今司長官放姓○萬曆初芒市土酋放福導緬

入寇討斬之轄諸隴把○青石山在司西南峭拔

千仞奇詭萬端又有永貢幹孟契二山皆夷酋之

險也立寨居之下有芒市河○麓川江在司西源
出峨昌蠻境流入大盈江○大車江源自騰越州
流經青石山下至緬甸江頭城名大盈江入蒲甘
城界○其川原曠遠田土富饒人稍脆弱男子衣
緞布婦人分髮直額爲一髻垂後跣而衣皮

茶山長官司

地在騰越西北五百里據高黎共山地瘠土寒不
生五穀其人強悍好鬪土酋早姓舊屬孟養永樂
三年孟養叛茶山不從自詣闕下授長官司其
地僻遠常爲野人殺虜今奔入內地阿幸棲住

麻里長官司

國朝置地與茶山接壤舊亦屬孟養土酋刀姓其
副早姓亦以拒賊功授官所轄皆峩昌夷近其地
亦爲野人所奪奔入赤石坪棲住○茶山里麻之
外又有一種野人赤髮黃睛以樹皮爲衣首戴骨
圈插雉尾纏紅藤醜惡兇悍登高涉險如飛男婦
漁獵爲生茹毛飲血夜宿樹上逢人卽殺無酋長
約束二長官爲所戕破至避之滇灘關內○峩昌
蠻耐寒畏暑喜燥畏濕好高山刀耕火種形貌紫
黑婦女以紅藤爲腰飾性嗜犬祭必用之占用竹

三十三根畧如筮法嗜酒背負不擔弗擇污穢覓禽獸蟲豸皆生噉之采野葛成衣無酋長管束雜處山谷夷羅之間聽土司役屬○外有八寨長官司瓦甸長官司麻沙長官司沙勒長官司俱未詳

木邦軍民宣慰使司

去省城以程計有五百東界八

百大甸 南界速克刺蠻 西界緬甸司

北界芒市司

舊名孟都一名孟邦元至元十六年立木邦軍民

總官府領三甸 本朝洪武十五年改木邦府後

改今司宣慰使罕姓○楊慎次謝高泉有喚金寧

卽非金齒建木由來是木邦之甸相傳卽諸葛公

南征時木鹿大王後也在姚關南慶喳里江千餘

里產響錫椒以征緬功分土稍廣故常與緬構怨

男子衣白文身髡髮摘髻鬚脩眉睫婦人衣白桶

裙耳穿金圈手套象錫男貴女賤雖小民亦視其妻如奴僕耕織貿易差役之類皆以委之○志云成化十八年木邦不靖兵部議調大軍征剿上謂木邦地極炎瘴宜事招撫諸夷順服具象馬寶石赴闕謝恩

車里靖安宣慰使司

去省城以程計東界落凡一百有八

恐蠻

西界八百大甸

南界波勒蠻

北界元江府

自古不通中國車里倭泥貉黨蒲刺黑角諸蠻雜居元世祖命兀良吉解伐交趾經其部悉降之至

元中置徹里路軍民總管府領六甸後又請置耿

凍路及耿當五弄二州

本朝洪武十七年改置

車里軍民府十九年改今宣慰使司其宣慰使亦

刀姓○車里卽產里也呂覽伊尹四方獻令曰產

里以象齒短狗獻周公作指南車導之歸故名車

里在者樂甸西南千里下臨九龍江有諸葛營壘

及碑夷性頗淳頗上刺一旗爲號作樂以手拍羊

皮長鼓而間以鐃鐸若中國僧道馬鄉村飲宴吹

蘆笙舞牌爲樂○元述律杰使車里車里以黃金

采女遺之一無所受蠻酋曰入我土而不爲金婦

傳者惟述律元帥一人 我朝永樂元年車里宣
撫司土酋乃暹答侵地擄官軍西平侯沐晟請討
之 上勅晟以理告諭暹答悔懼還所擄及地遣
使人謝有名山猛永江名沙木其水流入浪滄江
下交趾而達南海

緬甸軍民宣慰使司

去省城以程計凡三十八

東界木邦

司 西界曼里夷

南界南海

北界隴

川司

古西南夷不知何種其地舊有江頭太公馬來安
正國蒲甘緬王五城元至元中屢征服之後以蒲
甘緬王城置邦牙等處宣慰司 皇明洪武二十

九年歸附立今司其宣慰莽姓

江頭城在騰衝西南十五日程 太公城在江頭

城南十五日程 馬來城在太公城南八日程 安

正國城在馬來城南五日程 蒲甘緬城在安

正國城西南五日程去大理五十餘程所謂緬中

五城也 元世祖十八年大理鄯闡路宣慰都元

帥遣使招諭緬主不至明年遣諸王相答吾兒擊

之克江頭太公二城于是西南夷十二部俱降大

德元年封的立普哇拿阿迪提牙為緬國王賜之

銀印以其子信合八的爲緬國世子賜以虎符又
賜王弟撒邦巴一珠虎符酋領阿散三珠虎符從
者金符及金幣其國恃沙江爲險江岸濶五里餘
水勢洶湧地形廣衍元史云其人^{有城郭屋廬以}
居有象馬以乘舟筏以濟事佛敬僧有阿瓦剎城
邦亞直根等寺極其莊嚴有大事抱佛說誓質之
僧然後決○滇畧云緬甸古朱波地亦曰禪亦曰
驃至宋謂之緬在騰衝西南千餘里其人柔而詐
色黑如漆男子善浮水縮髻于頂以青白布纏之
婦縮髻于後不施脂粉其文字進上者用金葉書
之次用紙次用貝葉謂之緬書其國雖廣大近亦
衰弱爲木邦孟養所殘破也其酋號小刺浪酋長
出入乘平輪或騎象坐則從者圍繞其後皆席地
男子皆和白檀麝香當歸姜黃諸木塗身體及頭
面以爲奇○漢謂之禪國和帝永元中其王雍由
調遣使朝賀獻新樂及幻人能變化吐火自支解
易牛馬頭卽大秦國也○唐謂之驃國貞元八年
驃國王及其弟來朝亦獻其國樂十二曲與樂工
三十人 國朝洪武二十一年緬叛總兵黔寧王
沐英討之遣都督馮誠以輕騎挑戰大敗之生獲

象四十七而還嘉靖三十年緬酋瑞體攻本甸宣
慰司破之殺其酋長遂入孟養八百老撾萬曆十
年破干岸執土婦罕氏其明年瑞體子應裡糾隴
川岳鳳寇順寧破施甸猛淋盍達諸寨殺掠無筭
詔以劉挺爲遊擊將軍鄧子龍爲叅將會諸夷兵
大破之斬岳鳳應裡遁走○十五年復入寇陷密
堵送速二城兵備李材與遊擊劉天俸擊破之復
二城旣而巡按御史蘇鄼論材上首級不實 詔
逮材及故永昌知府陳嚴之下獄材謫戍嚴之削
籍十八年緬入孟養二十年入蠻莫鄧子龍擊却
之明年又入蠻莫破等練城與猛卯多俺分道入
寇巡撫都御史陳用賓擊走之遂城天馬漢龍二
關又明年擒多俺及其子皆斬之二十三年五宣
慰司又爲緬所陷自後未詳○其上產象緬地名
擺古距永昌可四千餘里莽酋居焉得象馴而習
之以供戰陣其梟者直千金貢象可三百金景東
土官常畜以備官索○琥珀產緬爨諸西夷地相
傳松脂入地千年所化又云楓木精液凝成其直
血珀及杏紅爲上金珀次之蠟珀最下又其下者
可供藥餌而已宋劉裕南征時寧州獻琥珀枕裕

大悅聞能治金創碎以給將士今重三五兩以上者即不可多得矣○赤藤直可為杖緬婦篋之以

為腰飾唐元微之詩友親過澹別車馬到江圍惟有紅藤杖相隨萬里來韓愈和虞部盧汀酬翰林

錢徽赤藤杖歌云赤藤為杖世未窺臺郎始携自滇池滇王掃宮避使者跪進再拜語嗚咿繩橋柱

過免傾墜性命造次蒙扶持途經百國皆莫識君臣聚觀逐旌麾共傳滇神出水獻赤龍拔鬚血淋

漓又裴夷直南詔朱藤杖詩六節南藤色似朱柱行塔砌勝人扶會須將入深山去倚看雲泉作老

夫○又產樹頭酒樹類椶高五六丈結實大如掌土人以麩納確中懸之樹下割其實使汁滴確中

即成酒或不用麩惟承其汁可熬為糖正白其葉用以寫緬字即貝葉也又產小茄如拇指可以散

毒小者尤佳○緬人有數種有老緬得楞子阿瓦如猛別雍會普澣洞吾擺古皆其類也地方平行

數千里性好鬪而貪利食不用匙筋交戰長于鳥銃色黑類哈喇男短衣長袴勢嶄緬鈴行聲謾謾

然別有一布護之

八百大甸宣慰使司

去省城以程計凡三十八

東界老

司 南界波勒蠻 西界木邦司 北界

孟良府

世傳其土酋有妻八百各領一寨因名八百媳婦
元初征之道路不通而還後遣使招附元統初置
八百等處宣慰司宣慰乃姓 洪武末年其酋來
貢乃立今司有南格刺山其上有洞北屬車里南
屬本司俗善畜象以騎以坐戰鬪以爲先驅又產
白檀安息諸香所謂八百香也○滇畧云八百媳
婦與木邦接壤男女服食皆同但刺花樣于眉目
間與客相見則把手爲禮喜事佛寺塔極多一村
一寺每寺一塔殆以萬計號慈國其酋惡殺不喜
爭敵侵不得已而應得所讐言而罷○滇畧云舊有
底馬撒大古喇二宣慰司近皆爲緬所併舊底馬
撒之地未詳大古喇以 國朝永樂四年遣官招
諭雲南西南夷大古刺小古刺等部落皆願內屬
置宣慰司二長官司五通考大古喇正德中始置
南甸宣撫司其地也男女色黑尤甚俗同哈喇○
產古喇錦宋歐陽修歸田錄云家歲西南夷人所
賣蠻布弓衣其文織成梅聖俞春雪詩真寶玩也
此物卽古喇錦

老撾軍民宣慰使司

去省城以程計者六十八

東界水尾

南界交趾

西界寧遠

北界車里司

俗呼撾家自古不通中國

本朝永樂三年其酋

備方物入貢始置今司原無姓酋長有三等大曰

招木弄次曰招木牛又次曰招化而襲宣慰者則

招木弄也○撾家者以其性好佩鵬爪地在八百

媳婦西南二千餘里民皆百夷酋長居高樓見人

不下部屬見之所至有定地名曰等限使客至彼

亦然但設通事引之以至其地不踰尺寸其酋一

代止生一子承襲絕不生女國人稱中國皇帝曰

天旺即天王之意又西千餘里則西洋海矣自車

里至老撾是為六慰○外有底馬撒宣慰司大古

喇宣慰司俱未詳

孟良禦夷府

去省城以程計九百三十有八

東界車里司

南界八百甸

西界木邦司

北界孟璉

司

蠻名子孟指在姚關東南二千里自古不通中國我

明未樂四年歸附其酋無姓號怕詔怕詔者夷之

尊稱也其地沃野千里男女俱警捷風俗與木邦

八百相似○滇程附錄云自干崖之火岡渡金沙

江過江畔多百夷家畜一撥廝鬼其鬼無形而善

噬人魂中者越宿而死死死則百夷取其尸為醢是

鬼畏犬聞聲則不能施□自金沙百里入小子孟貢

渡小孟貢江入大孟良孟良諸夷稱其官帥曰司
祿酋長曰刀猛卒伍曰皆夢出入以象名曰象馬
兵革犀利復多幻術爲家不設扃鑰漢人舍之有
行竊者夷主諷呪盜者卽病心腹必詣夷家歸其
竊物謝過復爲解之得巨石或利刃出其懷而愈
若鷲鳥搏其畜雞諷呪頃之鳥墜自空有石在鳥
喙野象或踐田禾亦如之不知何術也中國使至
其地夷帥自言曰是我兄天子使來偃然僭受朝
拜不爾不生還夷帥居層樓以避炎氛有妻數百
人日晡輒乘象出浴于江浴畢仍穿芻服羅拜其
主主解約臂金鐲授之者當夕口小孟貢江產鮓
魚食之日御百女故夷性極淫無論貴賤有數妻
而不相妬忌口山產彎葛餌刀圭則終歲絕人道
土人羞以飼牡馬口又產蚺蛇欲捕者先以鷄骨
卜吉則入山求蛇見人輒伏不動夷語之曰中國
皇帝求爾膽可伏死否則亦不汝貰是不昭汝靈
也蛇乃反背就剖今人言膽去猶活謬耳膽凡二
等生頷下者以傳毒矢居腹中者入藥病疽以童
便研一合吞又以少許傳瘡孔立愈居尾者不堪
用用亦不效口若蘇合香膽礬腦子阿魏麒麟竭

諸奇藥皆產焉獨無麝麝價與金相衡○地多虎
主人狎象而畏虎農作時皆宵宿樹杪結草寮以
捍風雨衣皆套項統裙以鷲毛為裯褥温毳勝于
木棉其境東及金沙江西為吐蕃南緬北撾數千
里

孟定禦夷府

去省城以程計九十八

東界威遠州

南

界木邦司

西界隴川司

北界鎮康州

舊名景麻元至元十六年立孟定路軍民總管府
領二甸隸大理金齒等處宣撫司 皇明洪武十
五年改今府舊土知府刁姓○總志云其民皆爨

夷男子禿頭赤脚黑齒着白布衣戴細竹絲帽以
金玉諸寶飾其頂遍插翠花翎毛之類後垂紅纓
婦人出外戴漆藤大笠狀類中國團牌而頂尖身
衣文綉飾以珂貝○其物產頗同孟良有大香櫟
較南安州為佳○志謂百夷即爨夷音相近所居
多卑濕棘地故字從棘從人今孟良孟定蒲緬等
皆爨也其俗稱宜慰為昭其官屬有叨孟昭錄昭
綱之名皆繫釵花金銀寶帶官民皆用笄釵為帽
以寶石飾頂狀如小塔上懸金鈴出入以乘象為
貴一奴銅帽花裳執長鈎制象為疾徐之節其相

見以合掌爲敬長于已則跪拜雖貴爲叨孟見宜
慰莫敢仰視凡有問則膝行前答三步一拜退亦
如之

威遠禦夷州

去省城以程計者十九

東界他郎甸

南

界孟璉司

西界孟定府

北界景東府

唐南詔銀生府之地舊爲濮落雜蠻所居大理段
氏時爲白夷所有元至元中置今州領編戶四里
上知州乃姓○境內有蒙樂山詳見景東府有南
堆江及谷寶江谷寶自遮遇甸流至州下流合瀾
滄江○有莫家寨河汲其水澆炭火上煉之卽成
細鹽交易無秤斗止以小篋羅計多寡而量之○
白人習俗朴野男女勇健走險如飛

灣甸禦夷州

去省城以程計者二十一

東界大候甸

南

界鎮康州

西界永昌之施甸

北界順

寧府

蠻名細賧在姚關東南七十里土知府景姓編戶
五里○民亦僰夷婦人貴者以象牙作筒長三寸
許貫于髻插金鳳蛾其頂絡以金索手帶牙鐲以
紅氍帶束臂纏頭衣白布窄袖短衫黑布桶裙不
穿耳不施粉其地山高水迅每至六月瘴癘盛行

水不可涉地不可居有黑泉水漲時飛鳥過輒墜
 夷以竿掛布浸而曝之以拭盤盂人食立死○孟
 通山境內出茶處也亦名灣甸茶味勝內地志云
 州近騰越界高黎貢山之麓厥土腴草卉貫四序
 不凋瘴氣最惡冬雪至春方融楊慎有灣甸茶歌
 云柘東丹極春滿邊灣甸有茶名家傳惜不逢炎
 皇與岐伯復不遇鴻漸及玉川英華阻貢日月篚
 芳菲只結烟霞綠灣甸山蟠赤虺路溟陰迤西蒼
 莽互羊韋羗兒背負籠籠箬重重香滿風○高黎
 其山之左右有平川灣甸界也商賈謠曰冬時欲
 歸來高黎其上雪夏秋欲歸來無柰灣甸熱春時
 欲歸來囊中資糧絕

鎮康禦夷州

去省城以程計二十三日

東界孟連司

南

界孟定府

西界永昌之潞江司

北界

大候州

蠻名石睽在灣甸東南編戶四里土知州悶姓黑
 棘所居形惡體黑以青白布為衣跣足荆棘中如
 飛男子出婦人閉戶靜坐以待有事籤雞骨卜吉
 凶病不服藥專祭鬼死則剝木為棺殯之墳上植
 一樹為識土田瘠狹有無量烏木龍二山產大藥

有如斗者味極其美有鮮子如棗而酸磷蛇膽可
解諸毒藥磷蛇磷屬四足長丈餘能吞豕鹿鎮康
孟養及臨安諸郡亦有之春冬在山夏秋在水其
膽治齒齲黃磷爲上黑者次之

大候禦夷州

卽雲州去省城以程計二十三

東界景東府

南界鎮康州

西界灣甸州

北界順寧

府

蠻名孟祐元中統初內附屬麓川路

皇明洪武

二十四年置大候長官司已改爲大候州編戶四

里萬曆二十五年大候州土酋猛廷瑞叛討平之

改置雲州○昔彌山在州東蠻賴山在州西各六

十里皆竹林○蠻彌山在州南二百五十里石厓

壁立之處山下東南麓卽瀾滄江○阿輪山在州

西南二百里四時蒼翠衆山所無○孟祐河在州

治東孟賴河在州南八十里其民二種百夷之俗

同于灣甸蒲蠻之俗同于順寧其地產垂絲竹其

枝葉軟弱皆下垂金剛纂其色青狀如刺桐性最

毒○脆蛇一名片蛇長二尺許遇人輒自斷爲三

四人去能復續乾之治惡疽腰以上用首以下用

其尾又治大麻風及痢○大候土官奉祿妻猛氏

順寧土知府猛雍女也雍惑于後妻欲以女改嫁
土舍奉誥女不從誥遂糾木邦攻破州治虜奉祿
以去值女先往父家得存獨居樓上素服憂憤雍
陰約奉誥將強之女佩刀自防者數月雍怒以藥
毒之女曰死固甘恨不見夫訣耳留緬書一紙詞
氣甚悲巡撫王啓命所司遣官奠祭且爲之贊曰
牝鷄悍兒女怨猛虎亂夫家變嗟嗟何日見夫面
君不見祭家姬雍家先血濺又不見劉家母王家
翻受禪吁嗟女兮豈不欲效雙飛燕破鏡難成片
一紙緬書流血撰黃泉路上見夫面

附夷

哈喇男女色黑如漆不知鹽梅男子以花布爲套
衣婦人以紅黑藤纏腰數十圍產子以竹堦盛之
負于背○哈杜稍類哈喇怒人頗類阿昌皆居山
巔言語不通畧似人形而已○曼里境上諸夷風
俗類緬僊其人不知四時節序望月出沒以測時
候地多平川土沃人繁勤于務本牛不穿鼻故不
服耕惟婦人用鑿鋤田春夏多雨秋冬多晴夏月
濕熱尤甚冬月常如仲春晝暖夜稍寒無霜雪烟
瘴多犯者必死草木禽獸皆有異者有草小穗而

尖自結為一蓼衣染之身即染瘴路傍大木多二
幹並生高二五丈許結為連理矮脚鷄無時自鳴
牝鷄亦然魚有鮎頭而鯉身者又有牛峰如駝者
市有熱池一畝許水沸如湯人不敢近以生肉投
之即熟物之珍者犀象孔雀鱗蛇雲母琥珀古刺
錦編藤漆器

總叙

貴州之名古未有也其治所則殷周之鬼方易曰
高宗伐鬼方詩蕩八章覃及鬼方是也漢稱羅甸
國唐稱羅羅鬼主宋元稱羅施鬼國今猶稱大鬼
王羅鬼也地在禹貢荆梁二州之南境宋朝紀要
以鬼方地林多貴竹原設有貴竹長官司因以名
州按土官安氏家譜有宋初勅諭云惟爾貴州遠
在要服則貴州之名已見于宋前矣迨元世祖至
元十六年西南八番羅氏等國來附洞寨凡一千
六百二十有六遂置八番羅甸等處軍民宣慰使

尖自結爲一蓑衣染之身卽染瘴路傍大木多二
幹並生高二五丈許結爲連理矮脚鷄無時自鳴
牝鷄亦然魚有鮎頭而鯉身者又有牛峰如駝者
市有熱池一畝許水沸如湯人不敢近以生肉投
之卽熟物之珍者犀象孔雀鱗蛇雲母琥珀古刺
錦編藤漆器

總叙

貴州之名古未有也其治所則殷周之鬼方易曰
高宗伐鬼方詩蕩八章覃及鬼方是也漢稱羅甸
國唐稱羅羅鬼主宋元稱羅施鬼國今猶稱大鬼
王羅鬼也地在禹貢荆梁二州之南境宋朝紀要
以鬼方地林多貴竹原設有貴竹長官司因以名
州按土官安氏家譜有宋初勅諭云惟爾貴州遠
在要服則貴州之名已見于宋前矣迨元世祖至
元十六年西南八番羅氏等國來附洞寨凡一千
六百二十有六遂置八番羅甸等處軍民宣慰使

司于貴州今貴陽府所轄長官司有程番韋番方
番洪番龍番金石番羅番盧番者即元初之八番
也嗣後又分龍番為卧龍大龍小龍三番云舊志
獨今貴陽府及畢節平壩為羅施鬼國地今宣慰
司及安莊為羅甸國普定為羅鬼犵狁所居是鬼
方幅幘僅止于此宋之貴州亦止于此元建宣慰
司之後更鬼國為順元路以討平九溪十八峒為
郡縣并立總管府俱聽本路節制至元二十二年
以思播二州隸之二十八年置八番順元宣慰司
都元帥府迭隸于四川湖廣二行省我 國初洪

武四年置貴州宣撫司隸四川六年陞為宣慰使
司十五年設貴州都指揮使司永樂十一年以思
南思州土官田琛田宗鼎梗化伏誅遂置思州新
化黎平思南鎮遠石阡銅仁烏羅八府因設貴州
布政使司而改貴州宣慰司并隸之十二年烏撒
衛來隸十七年都勻衛來隸正統二年永寧州來
隸三年設安順州流官來隸改普定衛來隸萬曆
二十九年平播州分其地為平越軍民府來隸今
所領府八州八縣十二宣慰司一衛二十二所

貴州名勝志卷之一

閩中曹學佺能始著

貴寧道所屬

貴陽軍民府

領一州二縣一安撫司十六長官司

五代時楚王馬殷遣八姓帥率邕管柳州兵討兩江溪峒至安氏疆土留軍戍之遂各分據號八番宋為羈縻南寧州治卧龍至道元年南寧酋長龍漢璜遣使率西南牂牁諸夷貢方物時龍氏最強諸番皆為所統自號龍番元至元十九年詔降夷八番金筑百餘寨三萬四千餘戶悉為郡縣置順

元路及貴州于今宣慰司治內以統之 明洪武
四年酋長密定等舉土內附置安撫司一長官司
十六隸貴州衛正統元年以木瓜麻嚮大華山長
官司割屬金筑安撫司及程番等十三長官司俱
直隸貴州布政司成化十年長官方勇等願開府
治設文官領之遂設程番府于程番長官司其安
撫司及十六長官司俱隸馬隆慶二年移府治于
省城益以貴竹平伐二司改名貴陽府萬曆二十
八年加軍民府○明楊慎滇程記云貴陽治城中
華夷雜居曰舊人曰羅羅曰宋家曰蔡家曰仲家

曰龍家曰魯竹龍家曰紅花佬曰花犴佬曰東苗
曰西苗曰紫江苗曰汀茅佬曰賣爺苗按舊人
者男女服食皆同中原蓋先代或宦或商流落于
此者云○羅羅本盧鹿而訛為今名也有二種居
水西十二營寧谷馬場漕溪者為黑羅羅亦曰烏
蠻居慕役者為白羅羅亦曰白蠻風俗畧同而黑
者為大姓羅羅俗尚鬼故又曰羅鬼蜀漢時有羅甸
國王自羅甸東西若自杞夜郎牂牁則以國名若
特磨白衣九道則以道名皆羅羅之種也其俗愚
蠻為主所虐至赤族猶舉其子姓若妻妾戴之不

以爲雙言故自火濟至今千有餘年世長其土其人
 深目長身黑面而白齒椎結跣躄荷氊戴笠而行
 腰束葦索左肩拖羊皮一方佩長刀箭箠富者以
 金釧約臂悍而喜鬪寬則以漁獵伐山爲生急則
 屠戮相尋故其兵常寇諸苗文字類蒙古與人食
 飯一盤水一盃七一枚抄飯哺許搏之若丸以匕
 躍口食已必滌膝刷齒作酒盎而不縮以蘆管啐
 飲男子薙髭而留鬚婦人束髮纏以青帶以雞骨
 占吉凶正妻曰耐德非耐德所生不得繼父位酋
 長死則集千人被甲曳馬若戰以錦緞氊衣裹

屍焚于野招魂而葬之名曰火葬張蓋其上盜取
 鄰境酋長之首以祭不得則不能祭其期會交貸
 無書契用木刻重信約盟誓凡有反側剝牛撫諭
 分領片肉不敢復背白羅羅之俗畧同而飲食惡
 草盛無盃盤爨以三足釜灼毛齧血無論鼠雀蚘
 蝨蠕動之物攫而燔之攢食若堯不通文字結繩
 刻木以爲信人死以牛馬裹屍而焚之口宋家蔡
 家皆中國之裔相傳春秋時楚子蠶食宋蔡二國
 得其人放之南徼遂流爲夷二氏風俗畧同而宋
 家稍雅馴通漢語或識文字勤于耕織男子帽而

長衫婦人笄而短短喪葬飯蔬飲水二十一日封而識之若馬鬣者即今宋宣慰之祖也口蔡家在底寨者與宋家同俗故世世連婚在養龍坑者無異苗人男女吹木葉而索偶人死不哭繞屍而歌謂之唱齋口仲家椎髻躡屨不通文字好為樓居飲食匙而不筴衣裳尚青婦人以青帛蒙髮狀若冑絮長裙細績多者二十餘幅拖腰以彩布一方若綬仍以青衣襲之喪食尚魚蝦而禁禽獸之肉葬以傘蓋墓期年焚之祭以枯魚而以十一月為歲首俗尚銅鼓中空無底或掘地得者皆誇言諸葛武侯所藏富家爭購即百牛不恡卜用茅或銅錢雞骨然姦而無義多為寇盜云口龍家蓋徙驩氏之裔訛為今名其種有四好依深林薦莽之間狙伺圍奪急則鼠竄貪而善讐嘗以孟羨為人犇命男子束髮不冠婦人斑衣以五色藥珠為飾貧者代以葦苡春時立木于野謂之鬼竿男女旋躍而擇對既奔則女氏之黨以牛馬贖之方通媒妁人死以杵擊臼和歌而哭昇之幽巖秘而不識以七月七日祭其先塋口四龍家與仲家同俗而衣尚白喪服則易青婦人緇布作冠若馬鐙在寧谷

西堡頂營之間者多張劉趙三姓一日大頭龍家
男子以牛馬鬃尾雜髮而盤之若蓋以尖笠覆之
一日狗耳龍家婦人辮髮螺結上指若狗耳之狀
亦曰小頭龍家一日曾竹龍家俗與龍家同○狠
狠一日狠狠其種有五蓬頭赤脚矯而善奔輕命
死黨得人片肉卮酒卽爲捐軀以赴湯火用布一
幅橫圍腰間傍無襍積謂之桶裙男女同制花布
者爲花狠狠紅布者爲紅狠狠各有族類不通婚
姻死者有棺而不塋置之巖穴高者絕地千尺或
臨大河不施蔽蓋以木主若圭羅樹其側號曰家
親殿在平伐者爲打牙狠狠剽悍尤甚父母死其
子婦各折其二齒投之棺中以示訣在新漆者爲
剪頭狠狠男女蓄髦寸許死則焚之又有猪屎狠
狠者喜不潔與犬豕同牢身面經年不醜得獸卽
咋食如狼□苗者古三苗之裔自長沙沅辰盡夜
郎之境皆有之與民夷混雜通曰南蠻散處山谷
間聚而成村者曰寨有名無姓有族屬無君長近
省界者爲熟苗輪租服役有司籍其戶口不與籍
者謂之生苗生苗多而熟苗少其俗喜則人怒則
獸睚眦之隙遂至殺人其人魍結跼蹐陔巖穴躡

荆棘捷如麋麋斑衣左衽或無衿袖竅以納首別
作兩袂急則去之插雞尾于巔負蘭抱弩遇便輒
鹵掠未娶者以銀環飾耳號曰馬郎婚則脫之婦
人維海肥銅鈴藥珠結纓絡為飾處子行歌于野
以誘馬郎狎淫不禁仲春刻木為馬祭以牛酒未
婚男女吹蘆笙和歌謂之跳月中意者男負女去
論妍媸為聘資多寡歲首以冬三月各尚其一曰
開年在宜慰司者有東苗西苗男髮髻着短衣色
尚淺藍首以織花布條束髮婦人着花裳無袖惟
遮覆前後裙亦淺藍色僅蔽其膝在白納為賣命
苗其俗賤老而貴少父老則拽而鬻之東苗鬻而
厲男子科頭赤脚婦人盤髻長簪西苗男子椎髻
上插白雞毛女子以蠟畫布衣

新貴縣 附郭

本貴竹長官司 明萬曆十九年奔龍里衛平伐
長官司地共置今縣以貴竹司為貴竹鄉平伐司
為平伐鄉知縣設流官丞簿各一員仍用上官

貴定縣 附郭

萬曆三十六年從守臣請割貴陽縣及定番州之
地設立今縣請額于朝而兩用之按是時葉福唐

當國謂其原籍福建福州府福清縣三福相連暨輿圖中未有偶者因請額疏至票擬為貴州貴陽府貴定縣以配之遂蒙 欽定如擬行焉

宣慰使司 附郭

蜀漢建興三年諸葛武侯南征時牂柯帥濟火積糧通道以迎武侯表封為羅甸國王其部落有七曰盧鹿蠻者即今羅羅俗尚鬼號正祭者為鬼主今猶謂之羅鬼居普里即今普定衛是唐開成初年鬼主阿風內屬會昌中封為羅甸王自濟火傳至普貴凡五十六代為宋開寶間納土歸附仍襲

王爵州之名貴或以地產貴行或亦以普貴云是時有宋景陽者真定人奉詔平定諸蠻有功因析置大萬谷落落總管府以景陽為總管嘉定間移府于今司治元初為羅施鬼國尋改羅甸軍民安撫司至元十六年更為順元軍民安撫司二十四年增置順元路并貴州于司治以統降附 我朝洪武初悉罷元所置而獨置貴州宣撫司六年陞宣慰使司今與貴陽府貴前二衛同在省城府衛所轄地在城北宣慰司所轄地在城南○按普貴之後至元末有靄翠宋氏之後有宋欽俱以洪武四

貴州通志 卷之一
年與土人安沙溪等歸附

高皇帝乃以霽翠爲宣慰使欽與沙溪皆同知得各統所部而霽翠強盛霽翠死其弟安的襲職故世爲安氏焉安氏領羅夷民四十八部其部長曰頭目宋氏領漢夷民十二部其部長曰馬頭又同知安氏領夷羅民一部其部長亦曰頭目而九長官司則宣慰司總領時有奢香者霽翠之妻也翠死貴州都督馬燁以小罪械致香裸撻之諸羅怒欲反時宋欽亦死妻劉代立劉謂奢香部羅曰無譁吾爲汝訴天子天子不聽及未晚也遂颺馳見

太祖白其事

太祖使劉折簡召奢香香卽與其

子婦亦颺馳至自陳守土功及馬燁罪狀

太祖

召燁斬之因封奢香順德夫人劉氏明德夫人奢香歸乃開貴州東北赤水烏撒道以通蜀烏蒙立龍場九驛世辦馬匹廩餼以報德劉氏傳至曾孫昂玄孫炫皆博學能詩文詳見後

貴州衛

附郭

洪武四年建領左右中前後五所

貴州前衛

附郭

洪武二十八年建領左右中前後五所

志云藏甲山在省城前衛治西南隅俗名鬼王洞
漢有王志者英武過人而貌寢軍中呼爲鬼頭官
至校尉從諸葛武侯南征禽雍閩過此藏盛甲以
鎮蠻相傳有人入洞盛甲猶在巖壁欲取之輒有
蝙蝠如鴉撲滅其火巖中啾啾有聲○東山在省
城東門外二里峭壁千仞越二里有銅鼓山亦高
百餘仞山半空洞常有銅鼓之聲又五里有棲霞
山腹有來仙洞明吳國倫東山詩九日不登高烟
霞澹林麓十日秋氣清東山倚天矗複道舒新綦
琳宮隱扶木振衣躡其巔一縱千里日荒城大如
斗衆山渺焉伏掃石坐層雲鳴鐘發幽谷僧至焚
妙香居然在天竺忽開西域蓮掩彼南陽菊何言
非吾土良遊此堪卜王守仁棲霞山詩古洞生寒
客到稀綠陰荒徑草霏霏書懸絕壁留僧偈花發
層蘿繡佛衣提榼遠從童冠集杖藜真覺鶴猿知
石門遙鎖陽明洞應笑山人久未歸○獅子山在
城南一里然城之東西里許皆有山如獅子狀又
城周圍有五虎山又南五里有鳳凰山相傳五虎
三獅一鳳凰者是也又南二里有高連山以其勢
高而連絡天馬貴人諸山故名唐史謂牂牁境內

有高連石門二山卽此又五十里有青巖巖下南
明河遶之至省河中有洲曰芳杜可資遊憩○城
北二里有貴山蜀道所經一名貴人峰城東北一
里有點易巖黔記云郡人易貴校易于此按易貴
宣慰司籍居江西吉水縣景泰甲戌進士歷官辰
州府知府所著有竹泉文集十五卷詩經直指十
五卷○三仙洞在宣慰司東四十里中有三石座
傍有石盆仰盛巖溜踰二十里有石門山山石對
峙如門故名○朝陽洞在司之西廢谷龍長官司
側其中可容數百人懸巖滴乳千態萬狀間有青

綠綴于石上踰二百五十里有瑤瑤山峰巒逶迤
宣慰安氏宅其山麓○白龍洞在司西北十五里
深入數十丈遊者秉炬導之半里許有水泠泠編
竹橋以度再入有鐘乳數株大如楹扣之戛然如
鐘○龍岡在司北五十五里龍場驛有東洞王守
仁闢之改名陽明洞天守仁餘姚人正德初以忤
劉瑾謫龍場驛丞初至無室居龍岡叢棘間遷于
東峰石穴卽陽明洞也龍場民憫其陰濕相與伐
木作室于叢棘之右名曰何陋軒後以禽宸濠功
封新建伯卒謚文成守仁龍岡新構詩謫居聊假

息荒穢亦須治鑿巖薙林條小構自成趣開窓入
 遠峰架扉出深樹墟塞俯逶迤竹木互蒙翳畦蔬
 稍溉鋤花藥頗雜蒔宴適豈專予來者得同憩輪
 奩匪致美毋令易傾敝陽明洞詩古洞闕荒僻虛
 設疑相待披萊歷風磴移居快幽塏營炊就巖竇
 放榻依石壘穿室旋薰寒夷坎仍掃灑卷帙漫堆
 列壺樽動光彩夷居信何陋恬淡意方在豈不桑
 梓懷素位聊無悔○陸廣驛在陸廣河側通水西
 之要路又有烏江湍流奔放水色深黑與播州相
 界處

定番州

在府南九十里

成化十年長官方勇等願開府治設文臣領之遂
 設程番府于程番長官司而司隸焉隆慶二年移
 府治省城萬曆十四年設定番州于舊府治仍隸
 以司○牂牁江在州城南源出州西北三十里亂
 山中南流入廣西泗城州為右江至潯州與左江
 合下番禺入南海謝三秀渡牂牁江詩江路分明
 舜水灣汀花汀草破愁顏朝憑短棹乘風去暮逐
 孤篷載月還逸興尚餘尊酒在浮名不及釣絲閒
 胡牀箕踞逢多暇看遍城南十里山

貴州各縣志 卷之一
金筑安撫司

在府西南一百二十里

唐爲牂牁國羈縻州地宋爲南寧州地元至元十九年置金筑司領十七長官司一縣 本朝洪武四年酋長密定歸順置金筑長官司于丰筮寨隸貴州衛十年陞安撫司十六年密定遷司治于杏林峰末樂十一年密定子得珠于馬嶺之陽卽爛寨也正統元年改隸貴州布政司成化十一年隸府○螺擁山在司城東二十里高五里其形如螺上有深淵水碧如藍四時不涸每天欲曙鳥獸咸集而飲之傍有螺湧寺一名羅末菴初 建文君

自遜國後一日至此題詩于壁吾學編及雌伏亭

叢記俱載之至萬曆間定番州知州王應昌訪其

事在羅榮寨五里許有白雲菴乃 建文題詩處

豈誤榮爲末誤寨爲菴耶菴畔一井周匝可二尺

許深半之相傳爲 建文所濬井中水恒雨不溢

恒旱不涸時有雙鯉出沒其間久旱出輒雨久雨

出輒晴其應不爽菴後有白雲洞外窄中爽可坐

可卧有隙通天光明內朗菴左右杉木數章大者

數圍小者合抱亦傳皆 建文手植

宣慰司所屬

青山長官司元置青山等處蠻夷軍民長官司

我洪武五年改今司正長官蔡劄土人 國初歸

附調征有功授長官傳至堂世襲副長官劉士真

土人洪武三十六年調征有功陞今職世襲右在

宣慰司西北三十二里

龍里長官司元為龍里縣洪武五年置今司正長

官何右善土人世襲右在宣慰司東五十里

水東長官司在宣慰司北三里元舊司仍以犵狁

蠻夷長官益之正長官向四副長官胡文英俱世

襲○又七十里為劄佐長官司正長官宋文忠土

人洪武五年授今職世襲○又二十五里為底寨

長官司正長官蔡永昌土人洪武四年任今職世

襲副長官梅忠鳳陽府人洪武八年征雲南有功

授今職世襲

養龍坑長官司在宣慰司北二百二十里土人蔡

普化洪武五年任今職世襲副長官土人謝文直

克把事永樂五年授今職世襲宋濂龍馬養序畧

云西南夷出良馬而產于羅鬼國者尤良其地有

養龍坑在兩山之中泓渟淵深蛟龍實藏其下當

春始和夷人立柳坑畔擇牝馬之貞者繫之已而

雲霧晦冥類有物蜿蜒跨馬腹上迨開霽視馬傍之沙有龍跡者是與龍遇矣至產必為龍駒洪武四年夏國主明昇獻良馬十其一色正白乃得之于此者身長十一尺首高九尺足之高比首殺其二尺有肉隱起項下約厚五分廣三寸餘貫纓絡腹至尾間而止振鬣一鳴萬馬辟易上乘之行夕月之禮于清涼山正如躡雲而馳一塵不驚賜名飛越峰命繪形藏焉

中曹蠻夷長官司元為白納縣阿聳寨地洪武五年改置正長官土人謝石寶副長官土人劉禮賓

俱世襲右在宣慰司南三十里○又四十里為白納長官司元白納縣後改中曹白納長官司旋益以茶山之地改茶山白納等處蠻夷軍民長官司洪武初歸附中曹已置司而白納之地失報宣慰司以頭目周可敬領其地永樂四年置今司遂以可敬為正長官土人趙仲祖為副長官俱世襲

垂西蠻夷長官司在司東一百五十里正長官土人楊文真副長官土人劉海俱世襲

定番州所屬

程番長官司附州元為武勝軍安撫司洪武五年

改置正長官程谷祥舊為安撫洪武初改授今職
世襲

小程長官司在州西北五里長官程受孫世襲

盧番長官司在州北五里元置盧番靖海軍安撫

司析其西地置盧番蠻夷軍民長官司洪武五年

合置今司以元安撫盧朝俸為正長官世襲

上馬橋長官司在州西北二十里元為上橋縣洪

武五年改置今司以方朝俸為正長官世襲

韋番長官司在州南五里洪武五年以元安撫韋

四海為正長官世襲○又三里為方番長官司正

長官方得川世襲亦元舊安撫也

卧龍番長官司在州南十五里宋置南寧州酋長

龍漢瑋稱雄長因號龍番元豐初入貢元改卧龍

番南寧州安撫司洪武五年改置今司以元安撫

龍得壽為正長官世襲

小龍番長官司在州東南二十里元為靜蠻軍安

撫司洪武五年以元安撫龍昶為正長官世襲

金石番長官司在州東二十五里宋為石番元為

金石番太平軍安撫司洪武五年改置今司以元

安撫石愛為正長官世襲

貴州通志 卷之一

大龍番長官司在州東南五十里元為應天府安撫司洪武五年改置今司

羅番長官司在州南三十里元為道蠻軍安撫司洪武五年改置今司以元安撫龍勢瑛為正長官世襲

盧山長官司在州南一百里元為盧山等處蠻夷軍民安撫司洪武五年改置今司以元土官盧經保為正長官世襲

木瓜長官司在州東一百里元初為羅賴州尋改木瓜等處蠻夷軍民長官司洪武五年改置今司

以元長官石蓋為正長官世襲是時南直隸人顧宸以征南有功授副長官世襲

麻嚮長官司在州南二百里洪武五年以得雍為正長官世襲

大華長官司在州南二百二十里洪武十年置

威清衛

唐宋為羅甸國地元為八番羅甸宣慰司地洪武初屬貴州宣慰司二十一年置威清站隸貴州衛

二十三年始置今衛隸都指揮使司在省城西四十五里山路稍夷木多野橙指揮劉世爵祖宅有

玩畧堂相傳 建文君遜跡過此為之書扁○華

蓋洞舊名涼傘洞副使焦希程改名雲龍御史李

本固復易今名希程記畧云去衛城西二里許有

洞洞門卑隘鑿折而入中可容數十人其上則氤

氲之氣蒸而成溜翦然蔚然崖石變幻望之如雲

狀態互異或如靈芝如蓓蕾如璣衡如疑露如蜂

房如蛛網篆烟盤旋於密石如齊統越殼飄縹從

輕風銳如懸錐莖如覆肝如神龍自天而下凜乎

雷電之將至○城西南一里有扁洞洞口扁窄內

漸寬廣深入則有小溪潺湲溪傍石乳盤屈如龍

蛇上有一竅通明○城南一里有曹本洞明厰如

堂越二十里有銅鼓山山半有洞每陰雨則其中

鏘然有聲○城西八里有的澄河源出普定九溪

壩流經衛城入洞伏流十里至青山復出明楊慎

詩山圍羅甸國水繞的澄橋橋下東流水可惜無

蘭橈

平壩衛

漢唐宋俱為羅甸國地元為金筑府地洪武二十

三年始置今衛屬貴州都司在省城西九十里學

士夏言平壩道中詩落日荒村生紫烟攢峰疊嶂

貴州名勝志 卷之一

七

畫屏連行雲帶雨穿松塢野水流香出稻田蟲響
空山秋榻靜月斜孤壁夜堂偏不眠起坐千憂集
城角無端到枕邊○南仙洞在衛東南十五里石
壁高十丈入洞二十餘武地勢寬平可容千人折
而西有深潭隱隱若神氣逼人不可正視歷磴而
上石窓開明垂照如室○衛城東十五里有洛陽
洞在洛陽河側四時有魚躍漁者張網其上因而
有稅其後稅免亦不得魚○聖泉在衛城西五里
而近里人劉汝楫記畧云自西郭沿溪流躡石磴
可五里許當壘柯疊嶂中一泓自石罅遙水滙爲

方池每日潮汐無停好事者置石鼓其內潮溢咫
餘下至鼓之半而止通書夜計之凡百次按弁洲
錄名百刻泉一統志名靈泉卽此楊用修詩瞻茲
虜沸流肇彼渾沌年盈涸在頃刻消息同坤乾塵
刹變潮汐億垓無貿遷岷觴行游聖坳舟喻思玄
迷踪鬼方霧蘊真羅甸烟詎逢陸羽品那遇桑欽
傳○嘉客泉舊名珍珠泉鼓吹喧鬧則水珠大湧
副使焦希程記畧云平壩西南十里有泉湧焉滙
而成池溢則成溪湛然其冽可鑑可酌冬溫而夏
清客至語笑明珠翠玉纍纍而沸風恬日霽明堂

射目客語在左則左應在右則右應衆寡亦如之
否則已殆如酬酢因名之曰嘉客泉

安順軍民府

在省城西北一百五十里

與普定衛同城

國初設安順州萬曆三十年改今府治普定衛城

舊志云部多羅鬼會飲不用盃酌置糟于瓮以藤

吸之男以氈爲禮人死火葬○舊坡山在府城西

北兩峰相對中有石關又五里爲新坡山○府城

西南三里有紅土坡土色如硃又十里有黑土坡

土色如墨○廣輿記云普定有天生橋石壁千仞

環繞如城水經其下驚濤急流乃天設之險也右

去府城東北五里博翠峰之麓有龍潭洞出洞十

餘丈卽橋明王守仁天生橋詩水花如練落長松

雲際天橋隱白虹遼鶴不來華表爛仙人一去石

樓空徒聞鵲駕橫秋夕漫說秦鞭到海東移放長

江還濟險可憐虛却萬山中

所屬土司

寧谷長官司在府西南二十五里元爲寨洪武十

九年置今司領二十九寨以本司人顧興仁爲副

長官正統元年三世孫雄有功陞正長官○司之

東南有乾海海水泛時與雲南旱海彼此相反或

其地脉更迭爲盈縮云

西堡長官司在府西北九十里元爲寨洪武十九年置今司領四寨二十五年以上却爲正長官其司之後有浪伏山元置習安州于山下越五十里有白石巖巖高頂夷有泉四時不竭一徑攀援而上○司東南五十里楚由洞山高數仞洞在山畔深廣百里又十里有播老鴉洞洞深不可測而山勢益險峻

普定衛

晉爲興古郡地唐爲羅甸國地羅鬼犴狍可剷苗

所居號普里部元初內附置普定縣尋改普定府隸雲南行省 國初洪武十四年復置普定府屬

四川布政司築城于今城東二十里尋增置普定衛徙今城十八年府廢衛存楊慎滇程云自平壩六亭至普定衛實荒徼名都永寧安順鎮寧三州同城地稍坦夷山如髻髮用修詩云鬼方昔云遐羅甸今初入陰霾暄凝交瘴氣昏曉集長亭比縣遙咫尺如棘澁石行蹶昆蹄沙炊烟蒸粒斷腸盤江河銷魂巖從坡軍堡鳴笳近蠻營荷戟多二辰晦光彩七旬歷滂沱剝衣從風亂蘆笙跳月歌可

憐異方樂令人玄髮皓○歡喜嶺在衛城北二里
洪武中蠻賊攻城指揮顧成追殺大勝于此故名
成後鎮貴州征五開六洞破一百三十七寨以左
都督封鎮遠侯卒年八十五贈夏國公謚武毅墓
在城東四十里

鎮寧州 與安莊衛同城

漢唐宋為牂牁郡羅甸國地號普東部元于羅黎
寨置和弘州尋改鎮寧州隸雲南普定路 國朝
正統三年改屬貴州布政司嘉靖十二年遷州治
于安莊衛城其俗不分貧富以牛多為大姓婚亦

論牛○火烘坡在州治北古名和弘山州舊治此
山石高其氣燥燠雖隆冬亦汗出浹背○州治
東有既濟泉其地極熱此水獨涼
州屬土司

十二營長官司在州北三十里元為十二營寨洪
武十九年置今司領二十九寨正長官隴阿住舊
為本司營長洪武十九年以功授今職安撫蕭傑
湖廣雲夢縣人洪武七年功授試副長官俱世襲
○司西五十里有阿破河土人以索為橋而渡名
索度橋

康佐長官司在州東四十里元為康佐寨洪武十
 九年改司正長官薛福壽江西贛縣人以功授今
 職安撫于成山東寧海州人初授試副長官三世
 孫鑑功陞今職俱世襲

安莊衛

洪武十四年以永寧鎮寧二州地置納吉堡二十
 二年改置安莊衛隸貴州都司○環翠山在衛治
 北白水河在衛治南有白虹橋跨之懸崖飛瀑過
 者不寒而慄○慈母山在衛城西三里俗名背兒
 崖形如母負子然又三里有雙明洞舊名紫雲洞

督學徐樾更今名樾記畧云將入洞之徑兩山夾
 道下有寒泉注為澄潭白石壁立半折崖側下有
 通徑劈竇圓如滿月緣門以入小徑夾崖前峰岬
 嶺蒼碧潭流穿石折而西迴又一方渚磷磷有聲
 東西風日相射南北繚繞石盤如蓋崖間石筍數
 尺形類佛座虛可容背其傍婉曲侍童環立者數
 人前溪橫小梁渡此穿石洞援步而登六七步間
 恍然光明堂壁四周洞開一面以吐日月上圓下
 方奇偉一室環壁靈異莫窮變態○白崖山距衛
 城十里山左有清泉中產異鱗或赤或紫清泉之

下流合碧溪入白水河滇程記云白水驛達渣城
 有雞首關嶺白石堡安龍菁凡六亭諺云渣城白
 水半人半鬼是滇路險絕首程也有懸崖疊水飛
 流瀑布自山端下注三罅相承其下為深潭神蛇
 宅之見者必嬰重疾發漲噴沫如雲霧籠冒數里
 ○關索嶺在衛南五十里滇程記云雞公背與關
 嶺相對兩山之趾界以溪澗嶺凡四十三盤至巔
 有香樹坡小菁口坡曰口東坡安龍菁坡胡椒凹
 象鼻嶺左右皆崖菁萬仞中僅有道如梁行者慄
 且汗郡人推官胡實關索廟記畧云按將軍舊傳

漢前將軍羽之子建興初赫丞相亮南征戢畧諸
 要害恩信孚于茲土世祀之
 ○初都督馬公躋
 是嶺始建祠洪武二十一年置關索雞背二堡尋
 併雞背入關索二十五年置守禦千戶所屬安莊
 衛楊慎關嶺曲四首倦枕愁雞鳴問郎今日程中
 路不可宿長途須早行
 又北登雞公背南望象鼻
 旣相逢試相問來往定誰難
 又關索嶺四十三盤
 高前有安龍菁行人莫辭勞
 又老鴉關仰樹問靈
 卜西去何當還

未寧州 與安南衛同城

唐爲烏蠻僮人狃狃所居元置永寧州初屬貴州
指揮使司正統二年始直隸布政司○黔記云州
治初建于打罕寨宣德間改建于關嶺所萬曆四
年改建于安南衛○紅崖山在州西北八十里壁
立萬仞山畔有洞深廣數十丈居民間聞洞中有
銅鼓聲或崖上紅花如火故名世傳諸葛武侯駐
兵之所夷人每祭祀牲用烏牛白馬則歲稔○盤
江在州東四十里源出烏撒經曲靖西由七星關
下入安南境北轉而東南至慕役司烏泥江通廣
西入南海三國志諸葛亮南征至盤山卽此夏秋
暴雨水氣紅綠色爲瘴過渡處兩山陡夾水勢洶
湧行人憚之楊慎盤江行可憐盤江河年年瘴癘
多青草二三月綠烟生碧波又保甸坡前不可留
盤江渡頭惟一舟驅龜役鵲無靈術誰是尋源博
望侯

州屬土司

頂營長官司元爲寨洪武四年置司本寨民阿光
歸附克寨長有功三十年陞正長官又湖廣麻城
人程士貴亦以四年歸克明氏千戶有功十九年
陞本司副長官俱世襲○司東三十里有雞公背

北三十里有關索嶺謝肇淛頂站詩云頂站高于關嶺高羊腸一線入蓬蒿平臨鬼國千峰上俯首盤江萬里濤

募役長官司元為寨洪武四年置今司是時本寨民阿夷以歸附充寨長十九年陞正長官又六合縣人杜仲仁歸附從軍十八年陞副長官俱世襲○司之西北四十里有象鼻嶺正北五十里有安籠菁俱險阻難行人滇路經其上○司西北三十里有白水河驛道之側水自高崖下注數十丈飛沫如雨蓋黔中瀑布之最奇者吳國倫象鼻嶺詩

山形如象鼻礪道擬蟻叢後渡千崖底車旋萬石中短亭微上月鳴瀑直生風白髮悲行險乾坤一轉蓬

安南衛

洪武十七年置尾灑驛站于普安路二十三年置今衛隸貴州都司設衛治于江西坡二十五年遷于尾灑堡尾灑者夷言也華言為水下楊慎云其南闔有尾灑井清甘可茗故名○獨秀山在衛城東一里又十三里有清源洞當官道傍洞出清泉崖石奇恠楊彝詩石乳淵澄濺齒香洞門深護翠

琳瑯雲浮寒壁晴猶雨露滿空青冷欲霜蟾吐夜
 光窺玉鑑鶴鳴清籟奏金商試茶取水陰崖底坐
 愛將軍大樹涼○朝陽洞在衛城南一里中出異
 石有泉從石隙中出澄徹如練石壁上刻有無名
 氏詩云崖前花發春正濃柳如黃金來煖風柔絲
 欄路挽不斷怕有俗子相交通當年老叟圍碁處
 猶有窮猿掛高樹花謝花開春又春幾載避秦不
 歸去紫芝瑤草變蒼苔碧桃紅樹成蒿萊市朝遷
 轉居人易興亡兩事俱哀哉我向洞中詢陳跡神
 仙遺石瑩如璧持得歸來售市人售遍市人俱不

識

普安州 與普安衛同城衛沿革詳州下

古夜郎疆域秦漢黔中牂牁二郡地至蜀漢始自
 為郡建興三年諸葛亮南征分建寧牂牁為興古
 郡者也唐武德二年改為西平州貞觀元年改名
 盤州以州東北有盤江又有盤江山故名是時隸
 戎州都督府蒙氏為南詔東鄙東爨烏蠻居之號
 于矢部蠻人性獷戾出入帶刀弩男子草屨衣婦
 女被花短裙以漁獵為生爨人服飾嗜好與宣慰
 司羅羅同其後爨酋阿宋更號齊彌部尋復為于

矢元延祐四年內附置于矢部萬戶府尋爲普山
府至元間改置普安路領和龍八納習舊普安四
部隸雲南省洪武十四年克復十六年初置普安
軍民府以土酋那邦妻適恭爲知府佐以流官適
恭卒子普旦代之普旦叛命襲陷普安府天兵討
平之始罷府置普安衛軍民指揮使司領其地未
樂元年置普安安撫司以土酋慈長爲安撫隸普
安衛十三年慈長謀不軌始改今州設流官隸貴
州布政司州治初在撒麻繼遷海子又再遷于衛
郭萬曆十三年遷入衛城○八部山在州東三十

里九峰摩霄一泉奔注舊普安在其下○州東北
七十里八納山高二十里其頂夷廣人跡罕到
相傳以爲酋益智藏其祖宗魂筒于崖穴間子孫
十年一登山祭之椎牛羊持刀擊鼓噪以往又八
十里有尾灑山安南衛在其陽迤出衆山又二十
里有盤江山安南安莊之界也沈最詩峻嶺岩崑
路向滇行人如蟻競攀緣何當絕頂凌風起少待
吹噓便上天○碧雲洞在州南三里舊名水洞外
狹內寬崖懸恠石不可名狀吏部主事楊彝歌
夫平生愛山水每聞勝景心獨喜故人邀我城南

遊出郭溪行二三里峰環路轉非塵寰雞犬人家
足生理恍然置我桃源中風景依稀乃相似耕田
鑿井不記年疑是秦人始居此谷中樹暗連桑麻
澗底花香雜蘭芷陰陽古洞蒼山根絕壁飛崖半
空倚豁然深入天窓明外狹中間如屋裏醉眠雲
磴高似牀袖拂平沙淨于几松風一派疑天來散
作泉流和宮徵泉來直與海眼通鶴髮仙人烹石
髓蛟龍窟窟變斯須白日陰崖電光紫一聲長嘯
洞雲寒日出林梢鶴飛起○黨壁山在州西南一
百七十里四山環繞東南一筍外狹中曠可容數
百家近城有狗場坡民無編戶土酋號十二營長
其部落有羅羅仲家犴佬棘人言語各不相諳以
棘人譯之夷俗有火炬二節丑未月二十四日是
辰此節擊鮮以祭小兒各持火噓戲于市○盤江
在州東二百里源自普暢塞經此東北流合爲泥
江

貴州各勝志卷之一終

www

ipdf

com

貴州省州志
卷之一

